


RI TOJBALIL MAC RI XUBEN RI JESUS

Ri Jesús xpe chuvach'ulef richin chi xcom coma ri vinaki' ri e c'o chuvach'ulef. Que c'a chuka' ri', xpe richin chi xuq'uen pe pa ruvi' rija' ronojel ri quimac ri vinaki' ri e c'o chuvach'ulef y richin yeruch'ajch'ojirisaj rije' y yeruch'ej riq'uin ronojel ri man choj ta. Riq'uin c'ari', roma rija' tok c'o jun rubeyal richin chi xquecolotej ta checonojel (tatz'e-ta' c'a ri DyC 76:41-42). Ri jun nimalej camelabel ri xuben ri Jesús richin queri' xutoj ri kamac, jari' rubini'an ri *tojball mac*. Ri banobel ri' más nic'atzin chike chuvech checonojel ri ch'aka' chic banobel chuvech re ruvach'ulef re'. "Roma c'atzinel c'a chi niban ri rutojbalil mac. Achi'el c'a nubij ri nimalej nuc'unic richin ri Jumul Dios, can c'o chi niban jun rutojbalil mac, o conojel ri vinaki' c'o chi yecom jumul. Can conojel vi. . . e tzakinek, y e sachinek, y can c'o vi chi xquecom jumul vi man niban ta ri rutojbalil mac ri can c'atzinel vi" (Alma 34:9).

Tabixaj c'a ri bix rubini'an "Janla Jebel ri Ajovabel."
¿Achi'que roma xpe ri Jesús chuvech re ruvach'ulef?

RI TOJBALIL MAC RI XUBEN RI JESUS NIC'ATZIN CHIRE RI KACOLATAJIC

Ri tzakinen richin ri Adán xuq'uen pe ca'i' ruvech camic. C'o c'a ri camic richin ri ch'aculaj y chuka' ri camic richin ri espíritu. Ri camic richin ri ch'aculaj, jari' nic'ulvachitej tok ruch'acul jun vinek nuch'er ri' riq'uin ri ru espíritu ri vinek ri'. Ri camic richin ri espíritu, jari' nic'ulvachitej tok jun vinek nich'aratej c'a el riq'uin ri Ajaf. Ri rutojbalil mac ri xuben ri Jesús xeruch'ec ri ca'i' ruvech camic ri'. Vi man ta xbanatej ri rutojbalil mac, xekac'ovisaj ta c'a ca'i' ruvech ruc'ayeval. Ri kach'acul y ri ka espíritu ch'aron ta c'a jumul. Chuka' manek ta chic jun rubeyal richin oj c'o



chic jun bey riq'uin ri Chicajel Katata'. Jac'a ri Chicajel Katata' c'o retamabal. Can xuben vi jun jebelilej rubeyal richin queri' xkojcolotej na pe chupan ri camic richin ri ch'aculaj y chuka' ri camic richin ri espíritu. Rija' xuk'ijuj chi xpe na jun Colonel richin xojrelesaj pe chupan ri kamac y chuka' chupan ri camic. Manek modo richin xkelesaj el ki' roma c'o ri kamac y man can ta nim ri kuchuk'a' (tatz'eta' c'a ri Alma 34:10-12). Nic'atzin c'a chi ri Kacolonel xa manek rumac y chi c'o ruchuk'a' pa ruvi' ri camic.

Tajunumaj c'a ri ach'acul riq'uin jun k'abaj chupan jun guante. Tavelesaj el ri guante chirij ri ak'a'. Tabij c'a chi jari' junan riq'uin ri camic richin ri ch'aculaj. Ri ak'a' (ri espíritu) y ri guante (ri ch'aculaj) xquijech yan qui'.

XAXE RI JESUCRISTO NITQUIR NUTOJ RI KAMAC

Ri Jesucristo xaxe rija' nitiquir yojrucol. Ri Tata'ixel xucha' ri Jesús richin noc ri Kacolonel. Ri Jesús, ja rija' ri Junayon Ruc'ajol ri Dios y romari' c'o ruchuk'a' pa ruvi' ri camic. Ri Jesús quere' xubij: "Roma yin ninya' ri nuc'aslen richin ninq'uen chic jun bey. Manjun nimajon chuve, xa yin ninya' ka nuyonil. C'o nuk'atbel tzij richin ninya' ka, y c'o nuk'atbel tzij richin ninq'uen chic jun bey" (Juan 10:17-18). Ri Jesús ruc'amon richin noc ri Kacolonel roma can xaxe vi rija' manek rumac. Roma c'ari', rija' ruc'amon richin nutoj ri quimac ch'aka' chic vinek.

Tac'utuj chire jun vinek chi tubij achique roma ri Jesús xaxe rija' nitiquir nutoj ri kamac.

CRISTO XUTIJ POKON Y XCOM RICHIN XUTOJ RI KAMAC

Ri Colonel xutoj ri kamac tok xutij pokonal chupan ri Getsemaní y xcom chuvech ri cruz. Manek modo richin nik'ax chikavech ri pokonal ri xuc'uaj ri Jesús roma ri quimac conojel ri vinaki'. Chupan ri Cotz'ijbel rubini'an Getsemaní ri ralal ri kamac xuben chire chi xutij janíla pokonal y xuc'ovisaj janíla bis. Janíla pokonal xuc'uaj chi romari' xel ruquiq'uel pa tak ruch'acul (tatz'eta' c'a ri DyC 19:18-19). C'ari', tok xtzekebex chuvech ri cruz, xcamisex riq'uin jun camisabel ri janíla pokonal y c'ayef rubanic.

Ri Jesús janíla xojrajo', y romari' xutij pokonal riq'uin ri ránima y ruch'acul koma roj. Ri Chicajel Katata' janíla yojrajo' y romari' xutek pe ri Junayon Ruc'ajol richin nutij pokonal y camic coma conojel ri ch'aka' chic ralc'ual. "Roma yalan xrajo' ri Dios ri ruvach'ulef, chi xuya' ri juney



Ruc'ajol, richin chi ronojel ri xtiniman rija' man xtisach ta, xa xtic'oje' ruc'aslen jumul'' (Juan 3:16).

Tabij chique ri vinaki' chi tiquinojij juba' chi e c'o chupan ri Cotz'ijbel rubini'an Getsemani' y niquitz'et ri Jesús nutij pokonal koma roj. C'ari', tac'utuj chire jun vinek chi tusiq'uuj ri banobel ri c'o chupan ri Lucas 22:39-44.

RI RUTOJBALIL MAC RI XUBEN RI JESUS Y RI RUC'ASTAJIBAL NUBEN CHI CONOJEL RI VINAKI' XQUEC'ASTEJ

Pa rox k'ij, ri Cristo xuc'ul chic jun bey ri ruch'acul y xc'astej pe. Ja rija' ri nabey vinek ri xc'astej pe chiquicojol ri caminaki'. Chupan ri rox k'ij ri', ri e rachibil ri Jesús xe'apon chuchi' ri jul acuchi xmukutej vi can rija'. E c'o c'a ángeles chiri' y rije' xquibij quere' chique ri rachibil ri Jesús: "Man c'o ta vave', roma xa xc'astej yan, achi'el ri rubin can'' (Mateo 28:6). Ri ruxlabal xoc chic riq'uin ri ruch'acul y manjun chic bey xtiqijech qui'.

Que c'are', xuch'ec ri Cristo ri camic. Roma ri rutojbalil mac ri xuben rija', checonojel ri vinaki' ri ye'alex pe chuvach'ulef c'o chi xquec'astej chic (tatz'eta' c'a ri 1 Corintios 15:21-22). Ri kánima y ri kach'acul xtiqitun chic qui', achi'el ri rubaniquil tok xc'astej ri Jesús. Ri Alma xubij chi ri vinek "man xticom ta chic. Ri cuxlabal niqitun qui' qui-q'uin ri quich'acul, y man xquijech ta qui' chic'' (Alma 11:45). Jare' ri rubini'an man camel ta. Checonojel ri vina-ki' ri e petenek chuvach'ulef c'o chi xquec'astej chic. Ri c'astajibel xtype chique conojel "ri e rijitek y ri e ac'uala', chuka' chique ri e tz'apel y ri e solcopin. Chuka' xtype chique ri ixoki' y ri achi'a', y chique ri e utz y ri e itzel'' (Alma 11:44).

Tachapa' jun bey chic ri guante. Tabij c'a chique ri vinaki' chi roma ri rutojbalil mac ri xuben ri Jesús koma roj, checonojel ri vinaki' xquec'astej chic. (taju' chic ri ak'a' chupan ri guante). Ri kach'acul y ri ka espíritu xtiqitun chi qui'.

RI TOJBALIL MAC NUBEN CHI YECOLOTEJ RI VINAKI' RI NITZOLIN PE QUIC'U'X

Ri rutojbalil mac ri xuben ri Cristo nuben chi yojtiquir nika-ch'ec ri camic richin ri kuxlabal. Kitzij chi checonojel ri vinek xquec'astej riq'uin jun quich'acul riq'uin bakil y tiojil. Man riq'uin vi ri', xaxe ri xqueniman richin ri rutojbalil mac ri xuben ri Jesús, xaxe rije' xquecolotej chire ri camic richin ri uxlabel. Nikak'alajirisaj chi nikanimaj ri rutojbalil

Chupan ri cotz'ijbel rubini'an Getsemani', ri Cristo xutoj ri rajel ruq'uexel ri quimac conojel ri vinaki'.

Ri Cristo xcom chuvech ri cruz.

mac ri xuben ri Jesús tok nitzolin pe kac'u'x chupan ri kamac, y yojkasex chuxe' ya', y nikac'ul ri Uxlabixel, y yekatakej checonojel ri pixa'. Riq'uin re rubaniquil re', roj yojch'ajch'ojjirisex chuvech ri kamac y oj ruc'amon richin yojtzolin riq'uin ri Chicajel Katata' y xkojbec'oje' jumul riq'uin. Quere' xubij ri Colonel: Roma can kitzij chi yin Dios nutijon chic re pokonal re' coma conojel ri vinaki', richin queri' man ta c'a xtiquitij pokonal (DyC 19:16-17). Ri Cristo xuben ronojel ri c'o chi nuben richin xutoj ri kamac. Chikajujunal roj nic'atzin chi nitzolin pe kac'u'x y nikanimaj ri rutzij richin queri' ri rutojbalil mac ri xuben ri Jesús c'o xtrejkalej pa kac'aslen roj.

Ri jun kach'alal rubini'an Boyd K. Packer rija' jun apóstol. Rija' nuk'alajirisaj chikavech achique rubaniquil ri yojruto' ri rutojbalil mac richin yojcolotej vi nikaben ri kasamaj.

Quere' c'a xubij: "Xtintzijoje jun tzijonic chive. Jare' jun c'ambel tzij.

"C'o c'a jun achin ri c'o ri achique janíla nurajij xulok'. Rija' xunojij chi manek chic jun ri c'o ric'a'tz, xaxe ri achique xurayij xulok'. C'o c'a chi nukej ruquak richin nitiquir nulok' ri nrajo'. Queri' c'a, xunim ri' pa jun nimalej c'as.

"Ri rachibil ri achin ri' xquibij chire chi man ta nuben jun nimalej c'as chirij. Y chuka' xquibij chire chi tubana' cuenta ri' pa ruk'a' ri achin achojiq'uin xuben vi ri ruc'as. Man riq'uin vi ri', ri achin xunojij chi can janíla nic'atzin chire ri nrajo', y xunojij chuka' chi vacami yan nic'atzin chire. Rija' xunojij chi xtiquir xtutoj re c'as re' pa jun chic k'ij apon.

"Roma c'ari', rija' xunim ri' chuxe' ri c'as riq'uin ri achin. Xubij chire chi xtutoj re c'as re' pa jun chic k'ij apon. Rije' chuka' xquik'ijuj jun k'ij chi xtutzolij ri ruc'as. Xuc'ul c'a ri' ri quitzij riq'uin ri jun chic achin y xutz'ibaj ri rubi' chuvech jun vuj ri nik'alajirisan chi can c'o chi xtutoj ri c'as. Pero rija' man pokon ta ruc'u'x. Rija' nunojij chi malon xtiquir xtutoj re c'as re'. Xulok' yan ri achique xurayij y xunojij chi xa jari' ri nic'atzin chire.

"Ri achin binakel xoka' chuc'u'x ri jun chic achin achojiq'uin xuben vi ri ruc'as. Y c'o jantek rija' nutzolij juba'. Xunojij chi riq'uin juba' xtik'ax ruvi' ri k'ij tok c'o chi xtutoj chironojel ri ruc'as.

“Pero c’arunaj xapon c’a ri k’ij richin nutoj ri ruc’as y manjani tutoj chironojel. Queri’ xapon ri rajaf ri medio riq’uin ri achin y xubij chire chi tutzoli chironojel ri ruc’as.

“C’a chiri’ xk’ax chuveh chi ri jun chic achin c’o ruchuk’a’ richin yerumej el ronojel ri c’o riq’uin y chuka’ richin nutz’apij rija’ pa che’.

“Man yitiquir ta nintoj ri nuc’as vacami, xcha’ chire. Xa manek achojiq’uin nintoj vi.

“Ri rajaf ri medio quere’ xubij: C’o c’a chi nikatakej ri nubij ri jun vuj ri xkaben. Yin xquenmej c’a el chavech ronojel ri c’o aviq’uin y rat xcabe pa che’. Porque quere’ xkabij can. Can ja rat xarayin richin xakajon el viq’uin. Ja rat xatz’iban can ri abi’ chuveh ri jun vuj. Vacami c’o chi nibanatej achi’el ri nubij ri vuj ri xkaben can.

“Que c’ari’, ri achin aj c’as xuc’utuj chire quere’: ¿La manek ta cami modo nikak’ijuj jun k’ij chic richin xtintoj ri nuc’as? ¿La manek ta cami modo richin xtacuy ri numac richin man yibe ta pa che’? Rat nanimaj ri jun ch’abel rubini’an joyovabel. ¿La man ta cami xtajoyovaj nuveh?

“C’a c’ari’, ri jun chic achin quere’ xubij: Ri joyovabel xa jun ruveh. Ri joyovabel, xaxe rat yaruto’. Vi yin ninjoyovaj avech, manjun xtitojon chuve yin. Ja ri ruchojmilal ri k’atbel tzij ninvajo’ yin. ¿La nanimaj rat ri ruchojmilal ri k’atbel tzij?

“Yin xinnimaj ri k’atbel tzij tok xkaben re vuj re’, xcha’ ri aj c’as. Xinnojij chi xquiruto’ yin. Man nic’atzin ta chuve ri joyovabel chupan ri k’ij ri’. Y man xinnojij ta vi xtic’atzin chuve vacami. Yin xinnojij chi ri k’atbel tzij junan xkojruto’ choj ca’i’.

“Ri rajaf ri medio quere’ c’a xubij: Ri ruchomilal ri k’atbel tzij nubij chi vacami, natoj ri ac’as, o yabe c’a pa che’. Jari’ ri k’atbel tzij. Rat xabij can chi utz c’ari’, y vacami nic’atzin chi queri’ nikaben. Ri joyovabel manek modo richin nelek’ chuveh ri k’atbel tzij.

“Ri jun achin nrajo’ chi niban ruchojmilal ri k’atbel tzij y ri jun chic nrajo’ chi nijoyovex ruveh. Pero man yetiquir ta yesamej che ca’i’ junan. Tok nisamej ri jun, ri jun chic man nicusex ta.

“Ri aj c’as xubij quere’: Vi man xtacuy ta che ri nuc’as, manek ri joyovabel.

“Ri jun chic achin xubij: Vi xcatincuy che ri ac’as, manek chuka’ ruchojmilal ri k’atbel tzij.

“Ri ca’i’ nima’k tak pixa’ re’, manek modo richin yechojmir chiquivech. Jare’ ri joyovabel y chuka’ ri ruchojmilal ri k’atbel tzij. Che ca’i’ re nima’k tak pixa’ re’ man e q’uisel ta y nikanojij chi niquiti’ qui’. ¿La manek cami modo yesamej junan ri joyovabel y chuka’ ri ruchojmilal ri k’atbel tzij?

“¡Ja’, can c’o vi jun rubanic! C’o c’a modo richin nicuker ruvech ri k’atbel tzij y chuka’ richin nibanatej ri joyovabel. Pero nic’atzin chi c’o jun chic vinek richin nuto’. Y can que c’ari’ xc’ulvachitej quiqu’uin ri ca’i’ achi’a’ ri’.

“Ri aj c’as c’o jun rachibil. Xpe xo’ruto’. Janíla retaman ruvech ri aj c’as. Retaman chi c’o jantek man can ta utz xnojín ri aj c’as. Ri jun chic achin ri’ xunojij chi ri aj c’as nacanic juba’ roma runimon’ ri’ pa ruc’ayeval. Man riq’uin vi c’a ri’, rija’ xrajo’ xuto’ ri aj c’as roma ri nrajo’. Xch’o c’a riq’uin ri rajaf ri medio y y quere’ xubij chire:

“Yin xtintoj re c’as re’ vi rat xtavosk’opij el re aj c’as chire ri jun vuj ri ibanon. Queri’ man xtimajtej ta nojel ri e c’o riq’uin ri vachibil y man xtibe ta pa che’.

“Ri rajaf ri medio nuch’ob rij ri xubij ri jun chic achin. Jari’ tok ri achin ri’, ri xto’on, quere’ xubij: Rat xa xac’utun ri ruchojmilal ri k’atbel tzij. Re aj c’as re’ man nitiquir ta nutoj ri ruc’as. Man riq’uin vi ri’, ja yin xquitojon richin. Queri’, xticuker ruvech ri ruchojmilal ri k’atbel tzij. Manek c’a modo xtac’utuj más chuvech re’. Xa man pa ruchojmilal ta vi nac’utuj más.

“Que c’ari’ ri rajaf ri medio xubij chi utz queri’.

“C’ari’ ri achin ri nuben utzil richin xtiberutojo’ ri c’as xch’o riq’uin ri aj c’as y quere’ xubij: Vi yin nintoj ri ac’as riq’uin re achin re’, c’ari’ xa viq’uin yin xtic’oje’ ac’as. ¿La utz nana’ rat vi queri’ xtikaben che?

“Ja’ matiox, xcha’ ri aj c’as. Can utz vi queri’ nikaben. Ja rat at coloyon vichin, richin man yibe ta pa che’. Rat xajoyovaj nuvech.

“Utz c’ari’, xcha’ ri xtito’on richin. Rat xtatoj ri c’as chuve

yin. Ja yin xquibin chave achique rubanic che ri ac'as. Jare' c'ayef juba' chave rat, pero xcatiquir xtaben. Yin xtinya' jun rubeyal chave richin queri' xtaben. Man xtica'atzin ta chi yabe pa che'.

"C'ari', xtojtej ronojel ri c'as chire ri rajaf ri medio. Xbanatej ruchojmilal riq'uin rija' y man xk'aj ta ruvi' ri vuj quibanon can pa k'atbel tzij.

"Queri' c'a chuka' xjoyovex ruvech ri aj c'as. Xbanatej ri nubij ri ruchojmilal ri k'atbel tzij y chuka' ri joyovabel. Quere' xc'ulvachitej roma xc'oje' jun achin xoc k'axey tzij. Y romari', xya'ox ri xuc'utuj ri ruchojmilal y chuka' xc'achoj ri joyovabel."

Ri Jesucristo, ja rija' ri Kacolonel y chuka' ri nikasan tzij chike. Vi man ta rija', ja ta roj c'o ta chi yojtojon ri kamac. Ri mac xkaben, jari' ri kac'as. Queri' c'o ta chi yojcom riq'uin ri uxlabel richin nikatoj ri kamac. Pero roma ri e rubanalon rija', c'o c'a jun rubeyal richin xkojtzolin chic jun bey riq'uin ri Chicajel Katata'. Ri rubeyal ri' nrajo' chi nitzolin pe kac'u'x y yekatakej ri rupixa' ri Cristo.

Janíla jebel chike roj chi ri Cristo rubanon jun rubeyal richin xkojch'ajch'ojirisex chupan ri kamac. Quere' c'a xubij ri Cristo: Titzu', yin in petenek chuvech re ruvach'ulef chucolic pe re ruvach'ulef chupan ri mac. Roma c'ari', ri vinek ri nitzolin pe ruc'u'x y noka' pe viq'uin achi'el jun ti ac'ual, jac'a rija' xtinc'ul. Roma ri rajavaren ri Dios xa quichin ri e banayon quere'. Titzu' c'a, xa coma rije', yin xinya' ka ri nuc'aslen, y xintzekej pe chic. Roma c'ari', titzolin pe ic'u'x, y quixámpe viq'uin y quixcolotej ri ix c'o chuvech chijun re ruvach'ulef (tatz'eta' c'a ri 3 Nefi 9:21, 22).

Tasiq'ujij c'a ruvech ri Xquibanala' ri Apostoli' 2:38.

¿Achique ruc'amon nikaben richin nikac'ut chi kaniman ri rutojballil mac ri xuben ri Jesús?

Tasiq'ujij c'a ruvech ri DyC 19:16-17.

¿Achique ruc'ayeval ri xtiquic'ovisaj ri vinek ri man xqueniman ta ri rutojballil mac ri xuben ri Colonel?

Tabixaj c'a ri bix rubini'an "Tatzu', Nicom ri Colonel."

CH'AKA' CHIC MOCAJ RI UTZ YE'ANIC'OJ

Alma 34:9-16 (nic'atzin ri rutojballil mac ri xuben ri Jesús)

Romanos 5:12-17 (roma jun achin xpe ri camic y roma jun chic xpe ri c'aslen)

Elaman 14:15-18 (achique roma xcom ri Jesús)

Ri rox ri ruxe' ri nimanic (checonojel vinek yetiquir yecolotej)

Alma 34:9-16 (ri rayil pokonal richin ri Dios)

- 1 Pedro 1:18-20 (ri Jesús xcha'ox chupan ri rusamaj tok manjani tipe chuvach'ulef)
Mateo 16:21 (nic'atzin ri rayil pokonal richin Cristo)
Lucas 22:39-46 (xutij pokonal chupan ri pa Getsemani)
1 Juan 1:7 (ri Jesús yojruch'ajch'ojirisaj el chupan ri kamac)
2 Nefi 9:21-22 (ri Colonel xutij pokonal coma checonojel ri vinaki')
Juan 10:17-18 (ri Colonel c'o ruchuk'a' pa ruvi' ri c'astajibel)
Mosia 16:6-8 (c'o modo xkojc'astej roma ri xeruben can ri Jesús)
Alma 11:40-45 y ri Mormon 9:12-14 (xquec'astej pe checonojel ri vinaki')
Isaías 1:18 (xquesakirisex ri kamac)
1 Corintios 15:21-22 y 40-44 (xquec'astej pe checonojel ri vinaki')

RI AJ CHICAJEL UCHUK'A'

¿ACHIQUE CAMI RI AJ CHICAJEL UCHUK'A'?

Ri Katata' chila' chicaj janíla ruchuk'a'. Ri uchuk'a' ri' rubi-ni'an ri aj chicajel uchuk'a'. Riq'uin ri uchuk'a' ri' xtz'ucutej pe re ruvach'ulef y chuka' ri caj. Riq'uin re uchuk'a' re', ronojel c'o pa ruc'ojlen.

Ri Tata'ixel nuya' ri aj chicajel ruchuk'a' chique ri ralc'ual ri e c'o chuvech re ruvach'ulef. Jare' ri uchuk'a' y ri k'atbel tzij ri niquicusaj ri vinaki' ri e takon chubanic ri rusa-maj ri Dios y yesamej pa rubi' rija' (tatz'eta' c'a ri DyC 121:36).

¿ACHIQUE ROMA NIC'ATZIN RI AJ CHICAJEL UCHUK'A' VAVE' CHUVECH RE RUVACH'ULEF?

Nic'atzin chi nic'oje' kiqu'uin ri aj chicajel uchuk'a' richin chi yojsamej pa rubi' ri Dios. Riq'uin c'ari', c'o modo yekakasaj ri ch'aka' chic vinek chuxe' ri ya', y yekajiquiba' pe chupan ri K'ataj, y nikasamajij ri Lok'olej Va'in, y nikaben ri c'ulubic chupan ri lok'olej nimajay richin ri Ajaf. Stape' jun achin choj ránima, ri Ajaf man nuc'ul ta ri takbel ri nuben vi manek riq'uin ta ri aj chicajel uchuk'a' (tatz'eta' c'a ri Mateo 7:21-23). Re takbel re' nic'atzin chi yeban chuvech re ruvach'ulef coma ri achi'a' ri c'o quiqu'uin ri aj chicajel uchuk'a'.

Ri aj chicajel uchuk'a' nic'atzin chique ri achi'a' richin queri' niquic'uaj quibey chiquivech ri e c'o chupan ri Ru-k'ataj ri Jesucristo quichin ri Chojlaxela' chupan ri Ruq'uisibel tak K'ij. Chuka' nic'atzin chique richin niquiben ri rusamaj ri K'ataj chuvech chijun re ruvach'ulef. Tok ri Cristo xc'oje' chuvech re ruvach'ulef, rija' xerucha' cabla-juj apostoli' richin chi xquic'uaj quibey ri e c'o chupan ri

K'ataj. Rija' xuya' chique rije' ri aj chicajel uchuk'a' y ri k'atbel tzij richin yesamej pa rubi' rija' (tatz'eta' c'a ri Marcos 3:13-15 y chuk'a' ri Juan 15:16).

Chuka' ri aj chicajel uchuk'a' nic'atzin chike richin nik'ax chikavech ri rurayibal ri Ajaf, y richin nikaben ronojel ri nrajo' rija'. Ri Dios nuk'alajirisaj ri rurayibal chuvech ri rusamajel ri rucha'on pe. Jari' ri profeta. Ri profeta, ja rija' ri Ruvixal ri K'ataj. Ja rija' ri nitzijon pa ruquexel ri Dios. Nutzijoj c'a ri rurayibal ri Dios chique checonojel ri vinek ri e c'o chuvech re ruvach'ulef.

Tabij ca'i' oxil' cosas ri yetiquir niquben xaxe ri achi'a' ri c'o quiq'uin ri aj chicajel uchuk'a'.


Catzijon chirij ri aj chicajel uchuk'a' y achique roma yalan nic'atzin chike.


¿ACHIQUE MODO NIQUIC'UL RI ACHI'A' RI AJ CHICAJEL UCHUK'A'?

Ri Ajaf xuchojmirisaj jun utzilej rubeyal richin niyatej pe ri aj chicajel ruchuk'a' chique ri ruc'ajol ri e c'o chuvech re ruvach'ulef. Jun ala' o jun achin ri c'o chic chupan ri K'ataj c'o modo richin nuc'ul ri aj chicajel uchuk'a' vi rija' ruc'amon. Nic'atzin c'a chi rija' nuc'ul re uchuk'a' re' "ri-q'uin ri ruya'ic k'abaj pa ruvi' jolomaj ri niban coma ri e uc'uayon ri k'atbel tzij richin niqutzijoj ri utzilej rutzijol y niquisamajij ri rutakbal" (ri ro' Ruxe' ri Nimanic).

Can que vi ri' xquic'ul ri achi'a' ri aj chicajel uchuk'a' ojer can chupan ri k'ij tok c'o ri Moisés. "Y manjun nic'amon ka chuvech ri ruk'ij ri', xa ja ri oyon roma ri Dios achi'el Aarón" (Hebreos 5:4). Ri Aarón xuc'ul pe ri aj chicajel uchuk'a' riq'uin ri yukeyon richin. Jari' ri Moisés y ja rija' ri profeta (tatz'eta' c'a ri Exodo 28:1). Xaxe ri e uc'uayon richin ri aj chicajel uchuk'a' yetiquir niquiya' re uchuk'a' re' chire jun chic.

Ri achi'a' manek modo niquic'ayij o niquilok' ri aj chicajel uchuk'a'. Chuka' man yetiquir ta niquiq'uen ka quiyon rije' re uchuk'a' re'. Nikatz'et chupan ri C'ac'a' Retal Tzij ri achique xubanala' jun achin rubini'an Simón. Rija' c'o chuvech re ruvach'ulef tok ri apostoli' richin ri Jesús e c'o pa ruvi' ri K'ataj. Rije' e uc'uayon ri aj chicajel uchuk'a' richin ri Dios. Ri Simón xtzolin pe ruc'u'x y xkasex chuxe' ya'. Rija' jun novinek aj k'ij y ri vinaki' xquinojij chi rija' ruc'uan ri ruchuk'a' ri Dios. Man riq'uin vi ri', ri Simón





man ruc'uan ta ri aj chicajel uchuk'a' y rija' retaman chi man c'o ta riq'uin.

Ri Simón retaman chi ri apostoli' y ri ch'aka' chic samajela' chupan ri K'ataj e uc'uayon ri kitzij ruchuk'a' ri Dios. Ri Simón xutz'et chi ri apostoli' xquicusaj ri aj chicajel uchuk'a' richin xquiben ri rusamaj ri Dios. C'ari' rija' xurayij xuc'ul ri uchuk'a' ri'. Rija' xubij chi can xtulok' na ri uchuk'a' ri'. Jac'a ri Pedro, ri nabey apóstol, quere' xubij chire ri Simón: Tiq'uis ri apuak junan aviq'uin, vi nach'ob chi ri sipanic richin Dios niya'ox riq'uin puek (ri Xquibanala' ri Apostoli' 8:9-21).

Tabij chire jun vinek chi tusiq'uij ruvech ri ro' Ruxe' ri Nimanic.

¿Achique nic'ulun richin ri aj chicajel uchuk'a'? ¿Achique modo niyatej ri aj chicajel uchuk'a'?

¿Achique nitiq'uir niya'on ri aj chicajel uchuk'a' chire jun ala' o jun achin chupan ri K'ataj?

¿ACHIQUE MODO NIQUICUSAJ UTZ RI ACHI'A' RI AJ CHICAJEL UCHUK'A'?

Ri aj chicajel uchuk'a' nic'atzin chi nikacusaj xaxe richin yekaturusaj ri e ralc'ual ri Katata' ri e c'o chuvech re ruvach'ulef. Ri achi'a' ri e uc'uayon ri aj chicajel uchuk'a' nic'atzin chi rije' yequiyukej ri ch'aka' chic vinek riq'uin ajovabel. Man utz ta vi niban chique man pa rubeyal ta chique ri vinaki' y ri qui familia ninimex quitzij. Ri Ajaf rubin can chi ri aj chicajel uchuk'a' manek modo nicusex vi man pa ruchojmilal ta (tatz'eta' c'a ri DyC 121:36). Man utz ta vi nikajo' nikacusaj ri aj chicajel uchuk'a' chire ri ch'acoj puek, o vi xaxe nikaben ri karayibal roj. Vi quere' nuben jun achin, ri caj nujech'ej el ri' chuvech. Ri Ruxlabal ri Ajaf nibison. C'a c'ari', tok ri Uxlabel ri' elenek chic el, can niq'uis vi c'a chirí' ri aj chicajel uchuk'a' o ri k'atbel tzij richin ri achin ri' (tatz'eta' c'a ri DyC 121:37).

C'o modo chi ri achin nucusaj ri aj chicajel uchuk'a' chubanic utzilej samaj pa quivi' ri ru familia y chuka' pa quivi' ch'aka' chic vinaki'. Jari', xa vi nucusaj riq'uin ri utzilej ch'abel, ri coch'onic, ri jebel tak na'oj, ri ch'uch'ujil, y ri kitzij ajovabel (tatz'eta' c'a ri DyC 121:41). Que c'ari' nitiq'uir yerukasaj ri ch'aka' chic vinaki' chuxe' ya', y yeruji-quiba' can chupan ri K'ataj. C'o chuka' modo nusamajij ri Lok'olej Va'in y yeruturusaj ri e yava'. C'o c'a modo chi yeruturusaj ri rufamilia richin yeruto' chupan ri ruc'ayeval

y richin yeruchajij tok nic'atzin chique. C'o c'a chuka' modo yeruto' ch'aka' chic familia quiq'uin re lok'olej takbel re' tok nic'utux utzil chire.

Chuka' nicusex ri aj chicajel uchuk'a' richin yeyukex ri ch'aka' chic vinaki' ri e c'o chupan ri K'ataj. Riq'uin c'ari', jun achin chuka' nitiquir noc ri ruvi'xal jun Ruk'a' K'ataj, o jun obispo, o jun vi'xal richin jun achibilanic o jun uc'uey bey pa quivi' ri Ruxe'el K'ataj. Ri ixoki' chuka' c'o quisa-maj chupan ri K'ataj. Ri samaj ri' nibanatej riq'uin ri pixabanic ri niquiya' ri achi'a' ri e uc'uayon ri aj chicajel uchuk'a'.

Tasiq'uij c'a ruvech ri DyC 121:34-40. ¿Achiq ue cam i ri man utz ta rucusaxic ri aj chicajel uchuk'a'?

Tasiq'uij c'a ruvech ri DyC 121:41-44. ¿Achiq ue ri utz rucusaxic ri aj chicajel uchuk'a'?

¿ACHIQUE CAMI MODO YOJTURUSEX TOK UTZ NIKACUSAJ RI AJ CHICAJEL UCHUK'A'?

Ri Ajaf rubin can chi rija' janila yeruturusaj ri achi'a' ri niquicusaj ri aj chicajel uchuk'a' richin yeruto' ri ch'aka' chic vinaki': C'ari', ri acukubabel c'u'x xticovir riq'uin ri Ajaf. Chuka' ri rutijonic ri aj chicajel uchuk'a' xquekaka pan avánima, achi'el ri tef ri nikaka pe chicaj. Ri Uxlabixel xcarachibilaj benek ruvech. Ri ach'amey xtoc na jun ch'amey ri man jalatajel ta richin ruchojmilal y ri kitzij. Ri avajavaren xtoc na jun ajavaren man q'uisel ta, y manjun c'a xtinimon el richin, xa xcarucanoj c'a tibe k'ij tibe sek (DyC 121:45-46).

Jun profeta richin ri ruq'uisibel tak k'ij rubini'an David O. McKay xubij chi xqueturusatej chiquijujunal ri achi'a' ri utz quic'uan ri aj chicajel uchuk'a' pa ruchojmilal. Xubij c'a chi vi jun achinutz nuben riq'uin ri aj chicajel uchuk'a', c'ari', "rija' jebel xtuna' chire ri ruc'aslen. Xtinimer ri runojibal richin queri' cha'nin xtucha' ri utz chuvech ri itzel. Xtic'oje' utzilej tak runa'oj y xtujoyovaj quivech ri ch'aka' chic vinaki'. Man riq'uin ta ri', nim ri ruchuk'a' ri ruxlabal, y can cof vi pa'el richin nuto' ri ruchojmilal. Rija' xtunabej chi ri aj chicajel uchuk'a' xtuya' ruquicoten tibe k'ij tibe sek. Jari' jun ralaxbal c'aslic ya' ri nuc'akala' ri' chire ri c'aslen richin jumul''.

¿Achique turusanic ac'ulun riq'uin ri aj chicajel uchuk'a'?

¿Achique turusanic yatiquir xtac'ul apon riq'uin ri aj chicajel uchuk'a'?

Que'abixaj ri bix quibini'an "Matiox Kajaval Chi C'o Profeta," y "Can Nim ri Achin".

CH'AKA' CHIC MOCAJ RI UTZ YE'ANIC'OJ

DyC 107:1-100 (nik'alajirisex ruc'oijen ri aj chicajel uchuk'a')

DyC 20:38-67 (nik'alajirisex ri rusamaj ri aj chicajel uchuk'a') (tatz'eta' c'a chuka' ri Vuj quichin ri Yukenela' Chupan ri Aj Chicajel Uchuk'a' [PBMP0054CC]).